

গণপ্রজাতন্ত্রী বাংলাদেশ সরকার
কৃষি মন্ত্রণালয়
উপকরণ-২ শাখা
www.moa.gov.bd

নং-১২.০০.০০০০.০২৬.৪০.০২৮.১৬.৩২৪


তারিখ ১৩ পৌষ ১৪২৩ বঃ
২৮ ডিসেম্বর ২০১৬ খ্রিঃ

বিষয় : “সার (ব্যবস্থাপনা) আইন, ২০০৬ (সংশোধিত ২০১৬)” এর খসড়ার উপর মতামত প্রদান সংক্রান্ত।

উপর্যুক্ত বিষয়ের প্রতি দৃষ্টি আকর্ষণ করা যাচ্ছে। “সার (ব্যবস্থাপনা) আইন, ২০০৬ (সংশোধিত-২০১৬)” এর খসড়া প্রস্তুত করা হয়েছে। যা মতামত/পরামর্শের জন্য কৃষি মন্ত্রণালয়ের ওয়েবসাইটে www.moa.gov.bd আপলোড করা হয়েছে।

০২। প্রস্তুতকৃত খসড়া আইনের উপর সর্বসাধারণের লিখিত মতামত/সুপারিশ (যদি থাকে) ৫ (পাঁচ) কার্যদিবসের মধ্যে এ মন্ত্রণালয়ে প্রেরণের জন্য নির্দেশক্রমে অনুরোধ করা হলো।

সংযুক্তি : প্রস্তুতকৃত আইনের খসড়া ০৯(নয়) পাতা।


(মোহাঃ মনিরুল ইসলাম)
সহকারী সচিব
ফোন : ৯৫৪০৯৬৪

✓ প্রোগ্রামার
কৃষি মন্ত্রণালয়, বাংলাদেশ সচিবালয়, ঢাকা।
(আইনটি এ মন্ত্রণালয়ের ওয়েবসাইটে আপলোড করার অনুরোধসহ)

অনুলিপি :

১। অতিরিক্ত সচিব (প্রশাসন ও উপকরণ) মহোদয়ের ব্যক্তিগত কর্মকর্তা, কৃষি মন্ত্রণালয়, ঢাকা।

সার (ব্যবস্থাপনা) আইন, ২০০৬ (সংশোধিত ২০১৬)

১। সংক্ষিপ্ত শিরোনাম ও প্রবর্তন।- এই আইন সার (ব্যবস্থাপনা) আইন, ২০০৬ (সংশোধিত ২০১৬) নামে অভিহিত হইবে।

(২) ইহা অবিলম্বে কার্যকর হইবে।

২। সংজ্ঞা।-বিষয় বা প্রসংগের পরিপন্থী কোন কিছু না থাকিলে, এই আইনে-

(১) “অনুপুষ্টি সার বা Micronutrient Fertilizer” অর্থ এমন পুষ্টি উপাদান সম্বলিত সার যাহাতে জিংক, বোরন, আয়রন, ম্যাংগানিজ, কপার, মলিবডেনাম ও ক্লোরিন বিদ্যমান থাকে এবং যাহা, অল্প পরিমাণে হইলেও, উদ্ভিদের জন্য অত্যাৱশ্যকীয়;

(২) “আৱশ্যকীয় উদ্ভিদ পুষ্টি উপাদান বা Essential Plant Nutrients” অর্থ নিম্নোক্ত যে কোন এক বা একাধিক পুষ্টি উপাদান যথা:-

(ক) নাইট্রোজেন;

(খ) ফসফরাস;

(গ) পটাসিয়াম;

(ঘ) সালফার;

(ঙ) ক্যালসিয়াম;

(চ) ম্যাগনেসিয়াম;

(ছ) জিংক;

(জ) বোরন;

(ঝ) আয়রন;

(ঞ) ম্যাংগানিজ;

(ট) কপার;

(ঠ) মলিবডেনাম; এবং

(ড) ক্লোরিন;

(৩) “আদালত” অর্থ এই আইনের অধীন সংঘটিত অপরাধের বিচার করিবার এখতিয়ার সম্পন্ন কোন ম্যাজিস্ট্রেট আদালত কিংবা, প্রযোজ্য ক্ষেত্রে, মেট্রোপলিটন ম্যাজিস্ট্রেট আদালত;

(৪) “উদ্ভিদ বৃদ্ধি নিয়ন্ত্রক বা উদ্দীপক বা Plant growth regulator (PGR) or stimulant” অর্থ যে সকল হরমোন উদ্ভিদ বা উদ্ভিদের অংশবিশেষের বৃদ্ধি নিয়ন্ত্রণে বা উদ্দীপনকরণে সহায়তা করে;

(৫) “কমিটি” অর্থ ধারা ৪ এর অধীন গৃহীত জাতীয় সার প্রমিতকরণ কমিটি;

(৬) “খুচরা বিক্রোতা” অর্থ যে ব্যক্তি সরাসরি কৃষক বা ভোক্তার নিকট সার বিক্রয় করে;

(৭) “জীৱাণু সার বা Bio-Fertilizer” অর্থ জীৱাণু (Microbes) ভিত্তিক সার, যাহা বাতাসের নাইট্রোজেন সংবন্ধন বা মাটির অদ্রৱনীয় ফসফরাস ও অন্যান্য পুষ্টি উপাদান দ্রৱীভূতকরণপূর্বক উদ্ভিদে পুষ্টি উপাদান সরবরাহের মাধ্যমে ফসলের উৎপাদন বৃদ্ধিতে সহায়তা করে;

(৮) “নিবন্ধন” অর্থ ধারা ৮ এর অধীন নিবন্ধন;

(৯) “নিবন্ধনকারী কর্তৃপক্ষ” অর্থ সরকার কর্তৃক নির্ধারিত কোন কর্তৃপক্ষ;

(১০) “নিশ্চয়তা বিশ্লেষণ বা Guaranteed Analysis” অর্থ সংশ্লিষ্ট সারের উপাদান হিসাবে স্বীকৃত সকল আৱশ্যকীয় উদ্ভিদ পুষ্টি উপাদানের নিম্নতম শতকরা হারের উল্লেখ;

(১১) “নির্ধারিত” অর্থ বিধি দ্বারা নির্ধারিত;

(১২) “নীট ওজন বা Net Weight” অর্থ সারের বস্তা, আধার বা কন্টেইনারের ওজন ব্যতীত সারের ওজন;

(১৩) “পরিদর্শক” অর্থ ধারা ৯ এর অধীন নিযুক্ত পরিদর্শক;

(১৪) “পরীক্ষাগার” অর্থ ধারা ২৭ এর অধীন সরকার কর্তৃক নির্ধারিত পরীক্ষাগার;

(১৫) “ফৌজদারী কার্যবিধি” অর্থ Code of Criminal Procedure, 1898 (Act V of 1898);

(১৬) “ব্যক্তি” অর্থ যে কোন ব্যক্তি এবং কোন প্রতিষ্ঠান, কোম্পানী, অংশীদারী কারবার, ফার্ম বা অন্য যে কোন সংস্থাও উহার অন্তর্ভুক্ত হবে;

(১৭) “ব্রান্ড অর্থ প্রচলিত রাসায়নিক বা সাধারণ নাম ব্যতীত সার চিহ্নিতকরণের উদ্দেশ্যে ব্যবহৃত শব্দ, ডিজাইন বা ট্রেড মার্ক যা সরকারি আইন বিধি বিধান দ্বারা নিয়ন্ত্রিত হইবে ;

(১৮) “বিধি” অর্থ আইনের অধীন প্রণীত বিধি;

(১৯) “বিনির্দেশ বা Specification” অর্থ ধারা ৭ এর অধীন জারীকৃত বিনির্দেশ;

- (২০) “মিশ্র সার বা Mixed Fertilizer” অর্থ বিভিন্ন ধরনের রাসায়নিক সারের সাথে রাসায়নিক সারের মিশ্রণ হইতে প্রস্তুতকৃত সার;
- (২১) “যৌগিক সার বা Compound Fertilizer” অর্থ অন্যান্য দুইটি আবশ্যিকীয় উদ্ভিদ পুষ্টি উপাদান বিদ্যমান রহিয়াছে এইরূপ রাসায়নিক সার;
- (২২) “রাসায়নিক সার বা Chemical Fertilizer” অর্থ অজৈব বা কৃত্রিম পদার্থ হইতে সংগৃহীত অথবা রাসায়নিক প্রক্রিয়ায় উৎপাদিত সার;
- (২৩) “লেবেল” অর্থ সংশ্লিষ্ট সকলের জ্ঞাতার্থে সারের বস্তা বা আধার বা কন্টেইনারের গায়ে ধারা ১৩ এ বর্ণিত বিবরণ;

- (২৪) “সার বা Fertilizer” অর্থ রাসায়নিক সার, জৈব সার এবং জীবাণু সার এবং ইহা ছাড়াও সরল সার, মিশ্র সার, যৌগিক সার, অনুপুষ্টি সার এবং সারজাতীয় দ্রব্যও ইহার অন্তর্ভুক্ত হইবে;
- (২৫) “সারজাতীয় দ্রব্য” অর্থ সার উৎপাদনের কাঁচামাল, Liming material, জৈব সার তৈরির জন্য কোন Bio-stimulant/Bio-activator বা Inocula/Inoculants ও পিজিআরও (PGR) ইহার অন্তর্ভুক্ত হইবে;
- (২৬) “সরল সার বা Straight Fertilizer” অর্থ উদ্ভিদের প্রধান তিনটি পুষ্টি উপাদান, যথা: নাইট্রোজেন, ফসফরাস, পটাসিয়াম এর যে কোন একটি বিদ্যমান রহিয়াছে এইরূপ রাসায়নিক সার;
- (২৭) “জৈব সার বা Organic fertilizer” অর্থ জৈব পদার্থ হইতে সংগৃহীত, প্রক্রিয়াজাতকৃত অথবা রূপান্তরিত সার;
- (২৮) “তরল সার বা Liquid Fertilizer” অর্থ গাছের এক বা একাধিক পুষ্টি উপাদান সম্বলিত কোন দ্রবণে দ্রবীভূত সার;
- (২৯) “সয়েল কন্ডিশনার/সয়েল এমেন্ডমেন্ট” (Soil conditioner/Soil amendment) অর্থ কোন জৈব বা অজৈব দ্রব্য যাহা মাটির ভৌত (Physical) রাসায়নিক (Chemical) বা অনুজৈবিক (Biological) অবস্থার উন্নয়ন সাধন করে;
- (৩০) “বায়ো এক্টিভেটর/জৈব উদ্দীপক (Bio-activator/bio-stimulant)” অর্থ যে সকল জৈব/অণুজৈবিক দ্রব্য (Biological/microbiological product) যাহা জৈব সার/কম্পোস্ট সার উৎপাদন প্রক্রিয়া ত্বরান্বিত করার জন্য ব্যবহৃত হয়;
- (৩১) “জেনেরিক নাম (Generic Name)” অর্থ সার বা সার জাতীয় দ্রব্যের রাসায়নিক নাম। জেনেরিক নাম দ্বারা কোন সার বা সার জাতীয় দ্রব্যের ট্রেড নাম (Trade name) কিংবা ব্রান্ড নাম (Brand name) বুঝাইবে না;
- (৩২) “ভেজাল সার” অর্থ যে সারে প্রয়োজনীয় পুষ্টি উপাদান ব্যতীত অনাবশ্যক বা পরিবেশ দূষণকারী ক্ষতিকর কোন পদার্থ থাকে; অথবা N, P ও K সম্বলিত সারের ক্ষেত্রে এক বা একাধিক পুষ্টি উপাদানের ঘাটতির পরিমাণ যদি নিশ্চয়তা বিশ্লেষণের শতকরা ৩ (তিন) ভাগের অধিক হয়; এবং Mg, S, Zn, B, Fe, Mn, Cu ও Mo সম্বলিত সারের ক্ষেত্রে এক বা একাধিক পুষ্টি উপাদানের ঘাটতির পরিমাণ যদি নিশ্চয়তা বিশ্লেষণ হইতে শতকরা ১.৫ ভাগের অধিক হয়; অথবা বিনির্দেশ বহির্ভূত যে কোন সার;
- (৩৩) “নিম্ন মানের সার”

ক) N, P ও K সম্বলিত সারের ক্ষেত্রে:

“নিম্ন মানের সার” অর্থ কোন সারের নিশ্চয়তা বিশ্লেষণ (Guaranteed Analysis) হইতে বিধি দ্বারা নির্ধারিত ইনভেস্টিগেশনাল এয়ালাউন্স (Investigational Allowance) বাদ দেওয়ার পর থেকে নিশ্চয়তা বিশ্লেষণের শতকরা ৩ (তিন) ভাগ পর্যন্ত ঘাটতি সম্পন্ন সার;

খ) Mg, S, Zn, B, Fe, Mn, Cu ও Mo সম্বলিত সারের ক্ষেত্রে:

“নিম্ন মানের সার” অর্থ কোন সারের নিশ্চয়তা বিশ্লেষণ (Guaranteed Analysis) হইতে শতকরা ০.৫ - ১.৫ ভাগ পর্যন্ত ঘাটতি সম্পন্ন সার।

(৩৪) “পুনঃরপ্তানি”: অর্থ স্থানীয়ভাবে পুনঃপ্রক্রিয়াকরণের মাধ্যমে পণ্যের গুণগতমান বা আকৃতির যে কোন একটির অথবা উভয়ের পরিবর্তনপূর্বক আমদানিকৃত পণ্যের মূল্যের সাথে ন্যূনতম ১০% মূল্য সংযোজনপূর্বক নির্ধারিত সময়ের মধ্যে পণ্য রপ্তানি করা কে বুঝাইবে।

৩। সংশোধিত আইনের সর্বশেষ রহিতকরণ ও হেফাজত।

(১) ইতোপূর্বে জারিকৃত এ সংক্রান্ত আইন এতদ্বারা রহিত করা হইল।

(২) উক্তরূপ রহিতকরণ সত্ত্বেও, রহিত আইন অধ্যাদেশের অধীন কৃত কাজকর্ম বা গৃহীত ব্যবস্থা এই আইনের অধীনেকৃত বা গৃহীত হইয়াছে বলিয়া গণ্য হইবে।

(৩) এ সংক্রান্ত অন্য আইনে যাহাই থাকুক না কেন এ আইন প্রাধান্য পাইবে।

৪। জাতীয় সার প্রমিতকরণ কমিটি (National Fertilizer Standardization Committee)।— (১) এই আইনের উদ্দেশ্য পূরণকল্পে, সরকার, সরকারি গেজেটে প্রজ্ঞাপন দ্বারা, কৃষি মন্ত্রণালয়ের সচিবকে সভাপতি করিয়া শিল্প মন্ত্রণালয়ের একজন প্রতিনিধিসহ সার বিষয়ে অভিজ্ঞতাসম্পন্ন অনূর্ধ্ব ১৫ (পনের) জন সদস্য সমন্বয়ে জাতীয় সার প্রমিতকরণ কমিটি গঠন করিবে।

(২) কমিটি নিম্নবর্ণিত কার্যাবলী সম্পাদন করিবে, যথা:—

(ক) সার সংগ্রহ, আমদানি, বিলিবন্টন, বিক্রয় ও ব্যবসা সংক্রান্ত বিষয়ে সরকারকে পরামর্শ প্রদান;

(খ) মান নির্ধারণ করা হয় নাই এইরূপ নতুন রাসায়নিক সার, জৈব সার, জীবাণু সার (Bio-fertilizer), মিশ্র সার, যৌগিক সার, সয়েল কন্ডিশনার/অ্যামেভমেন্ট এবং উদ্ভিদ বৃদ্ধি নিয়ন্ত্রক বা উদ্দীপক (Plant Growth Regulator (PGR) or Stimulator) এর গবেষণাগার ও মাঠ বা শস্য পর্যায়ে পরীক্ষা পরিচালনা এবং এই সকল পরীক্ষার ফলাফল বা পরিবেশের উপর উহার প্রতিক্রিয়া পর্যালোচনাপূর্বক দেশে উক্ত সামগ্রির উৎপাদন, আমদানি, বিপণন ও ব্যবহার অনুমোদনের জন্য সরকারের নিকট সুপারিশ পেশকরণ;

(গ) বিভিন্ন সারের এবং সার উৎপাদনে ব্যবহৃত কাঁচামালের বিনির্দেশ নির্ধারণের জন্য সরকারকে পরামর্শ প্রদান;

(ঘ) বিভিন্ন কৃষি পরিবেশ অঞ্চলে (Agro-ecological) মৃত্তিকা ও ফসলের উপযোগী বিভিন্ন খেডের মিশ্র এবং যৌগিক সারের বিনির্দেশ নির্ধারণের জন্য সরকারকে পরামর্শ প্রদান;

(ঙ) সারের ভৌত বা দানাদার মিশ্রণ প্রস্তুত পদ্ধতির (Formulation) বিষয়ে সরকারের নিকট সুপারিশ পেশকরণ;

(চ) সকল প্রকার সারের মান নিয়ন্ত্রণের জন্য প্রয়োজনীয় পরীক্ষাগার স্থাপনের বিষয়ে সরকারকে পরামর্শ প্রদান;

(ছ) সারের নমুনা সংগ্রহ ও বিশ্লেষণের পদ্ধতি নির্ধারণ বা পরিমার্জন;

(জ) অনুমোদিত সারের তালিকা পর্যালোচনা এবং প্রয়োজনে বিনির্দেশ সংশোধনপূর্বক তালিকায় সংযোজন বা বিয়োজনের বিষয়ে সরকারের নিকট সুপারিশ প্রদান; এবং

(ঝ) সরকার কর্তৃক প্রেরিত সংশ্লিষ্ট অন্য যে কোন বিষয়ে সরকারের নিকট পরামর্শ বা সুপারিশ প্রদান।

৫। কমিটির সভা।— (১) এই ধারার বিধানাবলী সাপেক্ষে কমিটি উহার সভার কার্যপদ্ধতি নির্ধারণ করিতে পারিবে।

(২) কমিটির সভা উহার সভাপতি কর্তৃক নির্ধারিত স্থান ও সময়ে অনুষ্ঠিত হইবে।

(৩) কমিটির সভায় উহার সভাপতি এবং তাহার অনুপস্থিতিতে তৎকর্তৃক মনোনীত কোন সদস্য এবং উভয়ের অনুপস্থিতির ক্ষেত্রে উপস্থিত সদস্যগণ কর্তৃক নির্বাচিত অন্য কোন সদস্য সভাপতিত্ব করিবেন।

৬। উপ-কমিটি।—কমিটি উহার সদস্য সমন্বয়ে এক বা একাধিক উপ-কমিটি গঠন করিতে পারিবে এবং উপ-কমিটিতে কমিটি বহির্ভূত কোন ব্যক্তিকেও অর্ন্তভুক্ত করা যাইবে।

৭। বিনির্দেশ (Specification) জারী। এই আইনের উদ্দেশ্য পূরণকল্পে সরকার, কমিটির পরামর্শক্রমে, সরকারি গেজেটে প্রজ্ঞাপন দ্বারা, সারের আবশ্যিকীয় উদ্ভিদ পুষ্টি উপাদানসহ অন্যান্য উপাদানের মাত্রা এবং সারের ভৌত গুণাবলী ও রাসায়নিক বৈশিষ্ট্য নির্ধারণের লক্ষ্যে বিনির্দেশ জারী করিবে।

৮। নিবন্ধন (১)। নির্ধারিত পদ্ধতিতে, নিবন্ধনকারী কর্তৃপক্ষের নিকট হইতে, নিবন্ধন গ্রহণ ব্যতীত কোন ব্যক্তি কোন প্রকার সার উৎপাদন, আমদানী, সংরক্ষণ, বিতরণ, বিপণন বা বিক্রয় করিতে পারিবেন না।

(২) কোন ব্যক্তি উপ ধারা (১) এর বিধান লংঘন করিলে উহা এই আইনের অধীন অপরাধ হিসাবে গণ্য হইবে এবং উক্ত অপরাধের জন্য তিনি ছয় মাসের কারাদণ্ড বা অনূর্ধ্ব তিন লক্ষ টাকা অর্থদণ্ড বা উভয় দণ্ডে দণ্ডিত হইবেন।

(৩) নিবন্ধনকারী কর্তৃপক্ষ বিনির্দেশ বহির্ভূত কোন সার নিবন্ধন করিবে না।

(৪) উৎপাদন ও আমদানীর জন্য, নির্ধারিত পদ্ধতিতে, প্রত্যেক প্রকার সারের পৃথক পৃথকভাবে নিবন্ধন গ্রহণ করিতে হইবে।

৯। পরিদর্শক।—(১) এই আইনের বিধানাবলী বাস্তবায়নের লক্ষ্যে সরকার, কৃষি সম্প্রসারণ অধিদপ্তরের এক বা একাধিক কর্মকর্তা বা অন্য কোন প্রতিষ্ঠানের কোন কর্মকর্তাকে বা অন্য কোন ব্যক্তিকে, নির্ধারিত পদ্ধতিতে, পরিদর্শক হিসাবে নিয়োগ করিতে পারিবে।

(২) উপ-ধারা (১) এর অধীন নিয়োগকৃত পরিদর্শক যে কোন সময় যে কোন সার কারখানা এবং তৎসংলগ্ন স্থান, সারের গুদাম বা সার বা সারজাতীয় দ্রব্য রাখা হয় বা পরিবহণ করা হয় এইরূপ যে কোন স্থান, যানবাহন বা সার বিক্রয়, বিপণন, বা বিতরণ কেন্দ্র পরিদর্শন ও উহাতে প্রবেশ করিতে পারিবেন।

(৩) উপ-ধারা (২) অনুসারে পরিদর্শনকালে পরিদর্শক —

(ক) সংশ্লিষ্ট ব্যক্তির সার ক্রয়-বিক্রয় সংক্রান্ত সকল কাগজপত্র এবং তাহার নিয়ন্ত্রণাধীন সার বা সারজাতীয় দ্রব্য বা উহার কাঁচামাল পরীক্ষা করিতে পারিবেন;

(খ) সার সংরক্ষণ বা বিক্রয়ের দায়িত্বে নিয়োজিত ও তৎসংশ্লিষ্ট কোন ব্যক্তিকে জিজ্ঞাসাবাদ করিতে এবং কোন অনিয়ম বা ত্রুটি লক্ষ্য করিলে প্রয়োজনীয় নির্দেশ দিতে পারিবেন;

(গ) এতদুদ্দেশ্যে সরকারের নিকট হইতে ক্ষমতাপ্রাপ্ত হইলে সরকার কর্তৃক নির্দেশিত পছায় সার বা সারজাতীয় দ্রব্য বা উহার কাঁচামাল বা সংশ্লিষ্ট অন্যান্য দ্রব্যের নমুনা সংগ্রহ করিয়া উহা পরীক্ষার জন্য পরীক্ষাগারে প্রেরণ করিতে এবং ক্ষেত্রমত, নির্ধারিত পদ্ধতিতে, উহার উৎপাদন, বিক্রয়, বিপণন বা বিতরণ বন্ধ রাখিবার নির্দেশ দিতে পারিবেন;

(ঘ) পরিদর্শনকালে পরিলক্ষিত যে কোন অনিয়ম বা ত্রুটি সম্পর্কে কৃষি সম্প্রসারণ অধিদপ্তরের সংশ্লিষ্ট উপ-পরিচালকের অথবা, সরকার কর্তৃক নির্ধারিত, কোন কর্মকর্তার নিকট প্রতিবেদন পেশ করিবেন; এবং

(ঙ) এই আইনের বা ইহার অধীন প্রণীত বিধির যে কোন বিধান লংঘনকারী ব্যক্তির বিরুদ্ধে মামলা দায়ের করিতে পারিবেন।

১০। সার উৎপাদন।—(১) কোন ব্যক্তি বিনির্দেশ বহির্ভূত কোন সার বা সারজাতীয় দ্রব্য উৎপাদন বা উহার মিশ্রণ প্রস্তুত করিতে পারিবেন না।

(২) উৎপাদিত সার বা সারজাতীয় দ্রব্যের গুণাগুণ পরীক্ষার জন্য প্রত্যেক সার কারখানা কর্তৃপক্ষ উহার সার কারখানায় একটি পরীক্ষাগার স্থাপন করিবে। তবে জৈব সার উৎপাদনকারী প্রতিষ্ঠান নিজস্ব পরীক্ষাগার স্থাপন না করা পর্যন্ত আবশ্যিকভাবে সরকার কর্তৃক বিনির্দিষ্ট যে কোনো একটি গবেষণাগারের সাথে সমঝোতা চুক্তিতে (Memorandum of understanding) আবদ্ধ থাকিতে হইবে, যাহাতে জৈব সার কারখানায় উৎপাদিত সারের গুণগতমান যাচাই/পরীক্ষা করিতে পারে।

(৩) কোন ব্যক্তি উপ-ধারা (১) বা (২) এর বিধান লংঘন করিলে উহা এই আইনের অধীন অপরাধ হিসাবে গণ্য হইবে এবং উক্ত অপরাধের জন্য তিনি ছয় মাসের কারাদণ্ড বা অনূর্ধ্ব তিন লক্ষ টাকা অর্থদণ্ড বা উভয় দণ্ডে দণ্ডিত হইবেন।

১১। সার আমদানি/রপ্তানি/পুনঃরপ্তানি।—(১) কোন ব্যক্তি বিনির্দেশ বহির্ভূত কোন সার বা সারজাতীয় দ্রব্য বা উহার কাঁচামাল আমদানি/রপ্তানি/পুনঃরপ্তানি করিতে পারিবেন না; তবে শর্ত থাকে যে, শস্যের জন্য প্রয়োজনীয় এবং পৃথিবীর অন্যান্য দেশে শস্য উৎপাদনে ব্যবহৃত হইয়া থাকে এমন কোন সার, বিজ্ঞানসম্মত প্রমাণ সাপেক্ষে এবং সরকার নির্ধারিত শর্ত ও পদ্ধতিতে নমুনা হিসাবে আমদানি করা যাইবে।

(২) কোন ব্যক্তি উপ-ধারা (১) এর বিধান লংঘন করিলে উহা এই আইনের অধীন অপরাধ হিসাবে গণ্য হইবে এবং উক্ত অপরাধের জন্য তিনি ছয় মাসের কারাদণ্ড বা অনূর্ধ্ব তিন লক্ষ টাকা অর্থদণ্ড বা উভয় দণ্ডে দণ্ডিত হইবেন।

(৩) আমদানিকৃত সার ছাড়করণের সময় উহার উৎপাদনকারী কর্তৃক নিশ্চয়তা বিশ্লেষণ (Guaranteed Analysis) এবং সংশ্লিষ্ট দেশের সরকার অনুমোদিত কোন সংস্থা কর্তৃক সারের বিশ্লেষণ প্রতিবেদন (Analysis Report) সম্বলিত প্রাক জাহাজীকরণ পরিদর্শন (Pre Shipment Inspection) (PSI) প্রতিবেদন দাখিল করিতে হইবে।

(৪) সমুদ্র, স্থল বা বিমান বন্দরে আমদানিকৃত সার বা সারজাতীয় দ্রব্য বা উহার কাঁচামাল ছাড়করণের সময় উহার নমুনা সংগ্রহ ও বিশ্লেষণ ত্বরান্বিত এবং ক্রটিমুক্ত করিবার উদ্দেশ্যে প্রত্যেক বন্দরের জন্য একটি পরিদর্শন কমিটি থাকিবে।

(৫) পরিদর্শন কমিটির কার্যপরিধিসহ অন্যান্য বিষয়াদি বিধি দ্বারা নির্ধারিত হইবে।

১২। বিনির্দেশ বহির্ভূত সার উৎপাদন, গুদামজাতকরণ, সংরক্ষণ, বিক্রয়, বিপণন, পরিবহন ও বিতরণ, ইত্যাদি।—(১) কোন ব্যক্তি বিনির্দেশ বহির্ভূত কোন সার বা সারজাতীয় দ্রব্য বা উহার কাঁচামাল উৎপাদন, গুদামজাত, সংরক্ষণ, বিক্রয়, বিপণন, পরিবহন বা বিতরণ করিতে বা দখলে রাখিতে পারিবেন না।

(২) কোন সার বস্তা, আধার বা কন্টেইনারে ভর্তি অবস্থা ব্যতীত অন্য কোনভাবে গুদামজাত, সংরক্ষণ, বিক্রয়, বিপণন বা বিতরণ করা যাইবে না;

তবে শর্ত থাকে যে, খুচরা বিক্রয়ের ক্ষেত্রে এই বিধি নিষেধ প্রযোজ্য হইবে না।

(৩) কোন ব্যক্তি উপ-ধারা (১) ও (২) এর বিধান লংঘন করিলে উহা এই আইনের অধীন অপরাধ হিসাবে গণ্য হইবে এবং উক্ত অপরাধের জন্য তিনি ছয় মাসের কারাদণ্ড বা অনূর্ধ্ব তিন লক্ষ টাকা অর্থদণ্ড বা উভয় দণ্ডে দণ্ডিত হইবেন।

১৩। সারের বস্তা, আধার বা কন্টেইনারের লেবেল।—(১) সার, সার জাতীয় দ্রব্য, উদ্ভিদ বৃদ্ধি নিয়ন্ত্রক বা উদ্দীপক বা (Plant Growth Regular (PGR) এর বস্তা, আধার বা কন্টেইনারের গায়ে অথবা পৃথকভাবে একটি লেবেল সংযুক্ত করিতে হইবে এবং উক্ত লেবেলে নিম্নবর্ণিত তথ্যাদি স্পষ্টাক্ষরে ও সহজে দৃশ্যমানভাবে বাংলা বা ইংরেজীতে লিখিতে হইবে যথাঃ

ক) সারের নাম অথবা Plant Growth Regulator এর নাম (PGR) (Brand name & Generic name with chemical formula)

খ) শতকরা হারসহ সক্রিয় উপাদান (Active ingredient)

গ) ভৌত অবস্থা (Physical Condition)

ঘ) নীট ওজন

ঙ) উৎপাদনকারী দেশ (Country of Origin)

চ) আমদানী কারকের নাম ঠিকানা :

ছ) নিবন্ধন নম্বর (Registration No.)

(২) কোন ব্যক্তি উপ-ধারা (১) এর বিধান লংঘন করিলে উহা এই আইনের অধীন অপরাধ হিসাবে গণ্য হইবে এবং উক্ত অপরাধের জন্য তিনি ছয় মাসের কারাদণ্ড বা অনূর্ধ্ব তিন লক্ষ টাকা অর্থদণ্ড বা উভয় দণ্ডে দণ্ডিত হইবেন।

১৪। বিনির্দেশ বহির্ভূত বা পরিবেশ দূষণকারী সার, ইত্যাদি।— (১) কোন ব্যক্তি বিনির্দেশ বহির্ভূত বা পরিবেশ দূষণকারী সার বা উহার কাঁচামাল উৎপাদন, সংরক্ষণ, বিক্রয় বা বিতরণ করিলে বা দখলে রাখিলে, পরিদর্শক —

(ক) অন্যান্য একজন স্বাক্ষরী উপস্থিতিতে উক্ত সার বা উহার কাঁচামালের নমুনা সংগ্রহ করিয়া উহা পরীক্ষার জন্য পরীক্ষাগারে প্রেরণ করিবেন;

(খ) লিখিতভাবে কারণ উল্লেখপূর্বক অবিলম্বে সংশ্লিষ্ট লটের সার বা উহার কাঁচামালের উৎপাদন, বিক্রয়, বিতরণ বা ব্যবহার অনূর্ধ্ব দশ দিনের জন্য বন্ধ রাখিবার আদেশ দিতে পারিবেন; এবং

(গ) বিষয়টি সম্পর্কে কৃষি সম্প্রসারণ অধিদপ্তরসহ সংশ্লিষ্ট জেলার কৃষি সম্প্রসারণ অধিদপ্তরের উপ-পরিচালকের নিকট অবিলম্বে প্রতিবেদন পেশ করিবেন।

(২) উপ-ধারা (১) (গ) অনুসারে প্রাপ্ত প্রতিবেদনের ভিত্তিতে এবং প্রয়োজনীয় তদন্ত অনুষ্ঠানক্রমে জেলার কৃষি সম্প্রসারণ অধিদপ্তরের উপ-পরিচালক যদি এই মর্মে সন্তুষ্ট হন যে, সংশ্লিষ্ট ব্যক্তি বিনির্দেশ বহির্ভূত অথবা পরিবেশ দূষণকারী সার বা সারজাতীয় দ্রব্য বা উহার কাঁচামাল উৎপাদন, সংরক্ষণ, বিক্রয়, বিপণন বা বিতরণের উদ্দেশ্যে দখলে রাখিয়াছেন বা সারের উক্তরূপ কাঁচামাল সার প্রস্তুতে ব্যবহার করিতেছেন তাহা হইলে তিনি —

(ক) উপ-ধারা (১) অনুসারে সংগৃহীত নমুনা পরীক্ষার ফলাফলের জন্য অপেক্ষা করিতে পারিবেন;

(খ) উপ-ধারা (১) এর দফা (খ) তে উল্লিখিত আদেশের মেয়াদ, প্রয়োজনবোধে পরীক্ষাগারের ফলাফল প্রাপ্তির অথবা দশ দিন পর্যন্ত, যে সময়সীমা কম হইবে সেই সময়সীমা পর্যন্ত বৃদ্ধি করিতে পারিবেন;

(গ) দফা (খ) অনুসারে প্রদত্ত আদেশ কৃষি সম্প্রসারণ অধিদপ্তরের সংশ্লিষ্ট অঞ্চলের অতিরিক্ত পরিচালককে উহার অনুলিপি সহ, যে ব্যক্তির নিয়ন্ত্রণে বা দখলে উক্ত সার বা সারজাতীয় দ্রব্য বা উহার কাঁচামাল রাখিয়াছে সেই ব্যক্তির নিকট প্রেরণ করিবেন।

(৩) উপ-ধারা (২) এর অধীন প্রদত্ত আদেশের বিরুদ্ধে কোন সংক্ষুব্ধ ব্যক্তি কৃষি সম্প্রসারণ অধিদপ্তরের মহাপরিচালকের নিকট উক্ত আদেশ প্রাপ্তির পনের দিনের মধ্যে আপীল করিতে পারিবেন।

(৪) আপীল প্রাপ্তির অনধিক দশ দিনের মধ্যে উহা নিষ্পত্তি করিতে হইবে এবং এতদবিষয়ে আপীল কর্তৃপক্ষের সিদ্ধান্ত চূড়ান্ত বলিয়া গণ্য হইবে।

(৫) উপ ধারা (৩) এর অধীনে প্রদত্ত আদেশের বিরুদ্ধে কোন সংক্ষুব্ধ ব্যক্তি সচিব, কৃষি মন্ত্রণালয়ের নিকট উক্ত আদেশ প্রাপ্তির ৭ (সাত) কর্ম দিবসের মধ্যে আপীল রিভিউয়ের জন্য আবেদন করিতে পারিবেন।

উপ ধারা (১) এর দফা (ক) অনুসারে পরীক্ষায় যদি নমুনা সার বা সার জাতীয় দ্রব্য উহার কাঁচামাল বিনির্দেশ বহির্ভূত অথবা পরিবেশ দূষণকারী বলিয়া প্রমাণিত হয় তাহা হইলে আপীলের মেয়াদ অতিক্রান্ত হইবার পর বা আপীল দায়েরের ক্ষেত্রে, আপীল নিষ্পত্তির পর, সংশ্লিষ্ট লটের সমুদয় সার বা সার জাতীয় দ্রব্য বা উহার কাঁচামাল সংশ্লিষ্ট সার উৎপাদনকারী, সংরক্ষণকারী, বিক্রেতা, বিপণনকারী বা বিতরণকারী বা যাহার দখলে থাকিবে সেই ব্যক্তিকে সরকার বা সরকার কর্তৃক ক্ষমতাপ্রাপ্ত কর্তৃপক্ষের নির্দেশিত পন্থায় নির্দেশিত সময়ের মধ্যে নিজ খরচে বিনষ্ট করিতে হইবে।

(৬) আপীল রিভিউয়ের জন্য আবেদন প্রাপ্তির অনধিক দশ দিনের মধ্যে উহা নিষ্পত্তি করিতে হইবে এবং এ বিষয়ে আপীল কর্তৃপক্ষের সিদ্ধান্ত চূড়ান্ত বলিয়া গণ্য হইবে।

(৭) কোন ব্যক্তি উপ-ধারা (৫) এর কোন নির্দেশ অমান্য করিলে উহা এই আইনের অধীন অপরাধ হিসাবে গণ্য হইবে এবং উক্ত অপরাধের জন্য উক্ত ব্যক্তি দুই বৎসর পর্যন্ত কারাদণ্ড বা অনূর্ধ্ব পাঁচ লক্ষ টাকা অর্থদণ্ড বা উভয় দণ্ডে দণ্ডিত হইবেন।

(৮) উপ-ধারা (৫) এ প্রদত্ত নির্দেশনামতে কোন ব্যক্তি সার বা সারজাতীয় দ্রব্য বা উহার কাঁচামাল বিনষ্ট না করিলে সরকার বা এতদুদ্দেশ্যে সরকার কর্তৃক ক্ষমতাপ্রাপ্ত কর্তৃপক্ষ উক্ত সার বা সারজাতীয় দ্রব্য বা উহার কাঁচামাল নির্ধারিত পদ্ধতিতে, বিনষ্ট করিবে এবং উক্ত বিনষ্টকরণে ব্যয়িত সমুদয় অর্থ সংশ্লিষ্ট ব্যক্তির নিকট হইতে (Public Demand Recovery Act, 1913 (Act. III of 1913) এর অধীন আদায় করা যাইবে।

১৫। নিম্ন মানের সার-

ক) N, P ও K সম্বলিত সারের ক্ষেত্রে:

“নিম্ন মানের সার” অর্থ কোন সারের নিশ্চয়তা বিশ্লেষণ (Guaranteed Analysis) হইতে বিধি দ্বারা নির্ধারিত ইনভেস্টিগেশনাল এয়ালাউন্স (Investigational Allowance) বাদ দেওয়ার পর থেকে নিশ্চয়তা বিশ্লেষণের শতকরা ৩ (তিন) ভাগ পর্যন্ত ঘাটতি সম্পন্ন সার;

খ) Mg, S, Zn, B, Fe, Mn, Cu ও Mo সম্বলিত সারের ক্ষেত্রে: “নিম্ন মানের সার” অর্থ কোন সারের নিশ্চয়তা বিশ্লেষণ (Guaranteed Analysis) হইতে শতকরা ০.৫ - ১.৫ ভাগ পর্যন্ত ঘাটতি সম্পন্ন সার।

(১) কোন ব্যক্তি নিম্ন মানের কোন সার উৎপাদন, আমদানি, গুদামজাত, সংরক্ষণ, বিক্রয়, পরিবহন, বিপণন বা বিতরণ করিতে পারিবেন না।

(২) কোন ব্যক্তি উপ-ধারা (১) এর লংঘন করিলে উহা এই আইনের অধীন অপরাধ করিয়াছেন বলিয়া গণ্য হইবে এবং উক্ত অপরাধের জন্য তিনি ছয় মাসের কারাদণ্ড বা অনূর্ধ্ব তিন লক্ষ টাকা অর্থদণ্ড বা উভয় দণ্ডে দণ্ডিত হইবেন।

১৬। ব্র্যান্ডের অপ-ব্যবহার (Misbranding)।—(১) কোন ব্যক্তি সারের নির্দিষ্ট কোন ব্র্যান্ডের পরিবর্তন ঘটাইয়া (Misbranding Fertilizer) উহা সরবরাহ, বিপণন বা বিক্রয় করিতে পারিবেন না।

(২) কোন সার নিম্নবর্ণিত কারণে ব্র্যান্ডের পরিবর্তন (Misbranding) হইয়াছে বলিয়া গণ্য হইবে, যথা:—

(ক) যদি সারের বস্তা বা আধার বা কন্টেইনারের লেবেল মিথ্যা বা বানোয়াট হয় বা অন্য কোন উপায়ে ভুল ধারণার জন্ম দেয়;

(খ) যদি পূর্ব অনুমোদিত অন্য কোন ব্র্যান্ডের নামে উহা বিপণন, সরবরাহ বা বিক্রয়ের প্রস্তাব করা হয়; এবং

(গ) যদি ধারা ১৩ এ বর্ণিত পদ্ধতিতে যথাযথভাবে লেবেলকৃত না হয়।

(৩) কোন ব্যক্তি উপ-ধারা (১) এর বিধান লংঘন করিলে উহা এই আইনের অধীন অপরাধ হিসাবে গণ্য হইবে এবং উক্ত অপরাধের জন্য উক্ত ব্যক্তি দুই বছর পর্যন্ত কারাদণ্ড বা অনূর্ধ্ব পাঁচ লক্ষ টাকা অর্থদণ্ড বা উভয় দণ্ডে দণ্ডিত হইবেন।

১৭। ভেজাল (Adulteration)।—(১) কোন ব্যক্তি কোন ভেজাল সার উৎপাদন, আমদানি, গুদামজাত, সংরক্ষণ, বিক্রয়, বিপণন বা বিতরণ করিতে পারিবেন না।

(২) নিম্নবর্ণিত কারণে কোন সার ভেজাল বলিয়া গণ্য হইবে, যথা:—

(ক) বিনির্দেশ বহির্ভূত কোন সার;

(খ) পরীক্ষাগার কর্তৃপক্ষ কর্তৃক প্রদত্ত সার বিশ্লেষণ সার্টিফিকেট অনুযায়ী যদি সারে ক্ষতিকারক পদার্থের উপস্থিতি এই পরিমাণ থাকে, যাহা লেবেলে বর্ণিত বিবরণ অনুসারে ব্যবহার করা হইলে মাটি, উদ্ভিদ, প্রাণী ও পরিবেশের জন্য ক্ষতিকর হইবে;

(গ) যদি সারের ব্যবহার বিধিতে উক্ত সারের অপকারিতা সম্পর্কে পর্যাপ্ত সতর্কতামূলক বিবরণ লেবেলে বর্ণিত না থাকে;

(ঘ) যদি লেবেলে বর্ণিত রাসায়নিক গঠন (Composition) অপেক্ষা নিম্নমানের উপাদানে অর্থাৎ N, P ও K সম্বলিত সারের ক্ষেত্রে এক বা একাধিক পুষ্টি উপাদানের ঘাটতির পরিমাণ যদি নিশ্চয়তা বিশ্লেষণের শতকরা ৩ (তিন) ভাগের অধিক হয়; এবং Mg, S, Zn, B, Fe, Mn, Cu ও Mo সম্বলিত সারের ক্ষেত্রে এক বা একাধিক পুষ্টি উপাদানের ঘাটতির পরিমাণ যদি নিশ্চয়তা বিশ্লেষণ হইতে শতকরা ১.৫ ভাগের অধিক হয়; অথবা অন্য কোন উপায়ে সার প্রস্তুত করা হয়; এবং

(ঙ) যদি সারে প্রয়োজনীয় উপাদান ব্যতীত অনাবশ্যক বা পরিবেশ দূষণকারী ক্ষতিকর কোন পদার্থ থাকে।

(৩) কোন ব্যক্তি উপ-ধারা (১) এর বিধান লংঘন করিলে উহা এই আইনের অধীন অপরাধ হিসাবে গণ্য হইবে এবং উক্ত অপরাধের জন্য উক্ত ব্যক্তি দুই বছর পর্যন্ত কারাদণ্ড বা অনূর্ধ্ব পাঁচ লক্ষ টাকা অর্থদণ্ড বা উভয় দণ্ডে দণ্ডিত হইবেন।

১৮। ক্ষতিকর পদার্থের জন্য বিশেষ বিধান।—(১) উদ্ভিদের ক্রমবৃদ্ধির জন্য ক্ষতিকর উপাদান বিশিষ্ট কোন সার বিশেষ ধরণের শস্যে প্রয়োগের জন্য ব্যবহৃত হইলে উক্ত সারের লেবেলে কমিটি কর্তৃক নির্ধারিত ক্ষতিকর পদার্থের পরিমাণ উল্লেখ থাকিতে হইবে এবং কমিটি কোন সারে ক্ষতিকর পদার্থের নিম্নরূপ সীমা নির্ধারণ করিবে, যথা:—

(ক) ইউরিয়া ফলিয়ার স্প্রে (Spray) হিসাবে অথবা লেবু জাতীয় শস্যে (Citrus) সার হিসাবে ব্যবহৃত হইলে বাই ইউরেট এর পরিমাণ অনধিক ১.৫%; এবং

(খ) তামাক জাতীয় ফসলে (যাহা অতিমাত্রায় ক্লোরাইড সংবেদনশীল) ব্যবহৃত সারে ক্লোরিন এর পরিমাণ অনধিক ২.৫%।

(২) উপ-ধারা (১) এ বর্ণিত নির্ধারিত পরিমাণ অপেক্ষা অধিক পরিমাণ ক্ষতিকর উপাদান থাকিলে উক্ত সার ধারা ২(৩২) এবং ১৭ এর অধীন ভেজাল সার হিসাবে গণ্য হইবে।

১৯। কম ওজন।—(১) কোন নিবন্ধিত ব্যক্তির দখলে বা নিয়ন্ত্রনে লেবেলে উল্লিখিত ওজন অপেক্ষা ০.৫০% (শূন্য দশমিক পাঁচ গুণ্য) ভাগের অতিরিক্ত কম ওজন সম্পন্ন সারের প্যাকেট, বস্তা, আধার বা মোড়ক পাওয়া গেলে, উক্ত নিবন্ধিত ব্যক্তি এই আইনের বিধান লংঘন করিয়াছেন বলিয়া গণ্য হইবে।

(২) কোন ব্যক্তি একাধিকবার উপ-ধারা (১) এর বিধান লংঘন করিলে উক্ত ব্যক্তির নিবন্ধন সনদপত্র প্রাথমিকভাবে নব্বই দিনের জন্য স্থগিত রাখা যাইবে এবং উক্ত বিধান লংঘনের পুনরাবৃত্তি ঘটিলে তাহার নিবন্ধন স্থায়ীভাবে বাতিল করা হইবে।

২০। সার বিক্রয় বন্ধ রাখার আদেশ।—(১) এই আইনের কোন বিধান লংঘন করিয়া কোন সার বিপণন বা বিক্রয়ের জন্য প্রস্তাব অথবা প্রদর্শন করা হইলে সরকার উক্ত সারের মালিক বা দখলদারকে (Custodian) উহার বিপণন, বিক্রয়, ব্যবহার বা অপসারণ বন্ধ রাখার আদেশ প্রদান করিতে পারিবে।

(২) কোন ব্যক্তি উপ-ধারা (১) এর আদেশ লংঘন করিলে উহা এই আইনের অধীন অপরাধ হিসাবে গণ্য হইবে এবং উক্ত অপরাধের জন্য উক্ত ব্যক্তি ছয় মাসের কারাদণ্ড বা অনূর্ধ্ব তিন লক্ষ টাকা অর্থদণ্ড বা উভয় দণ্ডে দণ্ডিত হইবে।

২১। বিচার।—(১) ফৌজদারী কার্যবিধিতে যাহা কিছুই থাকুক না কেন, এই আইনের অধীন অপরাধসমূহ স্থানীয় অধিক্ষেত্রসম্পন্ন জুডিসিয়াল ম্যাজিস্ট্রেট কিংবা, প্রয়োজ্য ক্ষেত্রে নির্বাহী ম্যাজিস্ট্রেট কর্তৃক ড্রাম্যমান আদালতে দণ্ড আরোপ করিতে পারিবে।

(২) ফৌজদারী কার্যবিধিতে যাহা কিছুই থাকুক না কেন, এই আইনের অধীন কোন জুডিসিয়াল ম্যাজিস্ট্রেট কিংবা, প্রয়োজ্য ক্ষেত্রে নির্বাহী

ম্যাজিস্ট্রেট কর্তৃক ভ্রাম্যমান আদালতে দোষী সাব্যস্ত কোন ব্যক্তিকে সংশ্লিষ্ট অপরাধের জন্য এই আইনে অনুমোদিত যে কোন দণ্ড আরোপ করিতে পারিবেন।

(৩) Penal Code, 1860 (XLV of 1860 এর section 21 এ সংজ্ঞায়িত কোন Public Servant বা কৃষি সম্প্রসারণ অধিদপ্তরের সংশ্লিষ্ট উপ-পরিচালক বা পরিদর্শক বা কৃষি সম্প্রসারণ অধিদপ্তরের মহাপরিচালক কর্তৃক ক্ষমতাপ্রাপ্ত কোন কর্মকর্তা অপরাধ বর্ণনাপূর্বক লিখিত আবেদন দাখিল না করিলে এই আইনের অধীনে দণ্ডযোগ্য কোন অপরাধ আদালত আমলে গ্রহণ করিবে না।

(৪) এই আইনের অধীন কোন অপরাধের সহিত অন্য কোন আইনের অধীন কোন অপরাধ যুক্তভাবে সংঘটিত হইলে এই আইনের অধীন বিচার্য অপরাধের বিচার এখতিয়ার সম্পন্ন জুডিসিয়াল ম্যাজিস্ট্রেট কিংবা, প্রযোজ্য ক্ষেত্রে নির্বাহী ম্যাজিস্ট্রেট কর্তৃক ভ্রাম্যমান আদালতে দোষী সাব্যস্ত করিতে পারিবে এবং অন্য আইনের অধীন সংঘটিত অপরাধের বিচার এখতিয়ার সম্পন্ন অন্য কোন আদালত বা ট্রাইব্যুনালে অনুষ্ঠিত হইবে।

২২। বিচার কার্য সম্পাদনের স্থান।—ফৌজদারী কার্যবিধিতে যাহা কিছুই থাকুক না কেন, এই আইনের অধীন সংঘটিত কোন অপরাধের বিচার সংশ্লিষ্ট আদালতের স্থানীয় অধিক্ষেত্রের মধ্যে যে কোন স্থানে অনুষ্ঠিত হইতে পারিবে।

২৩। বিচার পদ্ধতি।—এই আইনে ভিন্নতর কিছু না থাকিলে, এই আইনের অধীন সংঘটিত অপরাধের বিচার সংক্ষিপ্ত পদ্ধতিতে অনুষ্ঠিত হইবে এবং এতদুদ্দেশ্যে ফৌজদারী কার্যবিধির Chapter XXII-তে বর্ণিত পদ্ধতি, যতদূর সম্ভব, প্রযোজ্য হইবে।

২৪। আপীল।—এই আইনের অধীন কোন আদালত কর্তৃক প্রদত্ত কোন রায় বা আদেশ দ্বারা কোন ব্যক্তি সংক্ষুদ্ধ হইলে তিনি উক্ত রায় বা আদেশ প্রদত্ত হইবার তারিখ হইতে ত্রিশ দিনের মধ্যে এখতিয়ার সম্পন্ন দায়রা জজ আদালতে (Sessions Judge Court) বা প্রযোজ্য ক্ষেত্রে, মেট্রোপলিটন দায়রা জজ আদালতে (Metropolitan Sessions Judge Court) আপীল দায়ের করিতে পারিবেন: তবে শর্ত থাকে যে, রায়ের জাবোদা নকল (Certified copy) পাইতে যে সময় লাগিবে উহা উক্ত সময় হইতে বাদ যাইবে।

২৫। আসামির অনুপস্থিতিতে বিচার।—যদি আদালতের এই মর্মে বিশ্বাস করিবার যুক্তিসংগত কারণ থাকে যে,—

(ক) অভিযুক্ত ব্যক্তি তাহার গ্রেফতার বা তাহাকে বিচারের জন্য সোপর্দকরণ এড়াইবার জন্য পলাতক রহিয়াছেন বা আত্মগোপন করিয়াছেন; এবং

(খ) গ্রেফতারী পরোয়ানা জারীর সাত দিনের মধ্যে তাহার গ্রেফতারের কোন সম্ভাবনা নাই— তাহা হইলে আদালত জাতীয়ভাবে প্রকাশিত অন্ততঃ একটি বাংলা দৈনিক খবরের কাগজে প্রজ্ঞাপিত আদেশ দ্বারা অন্যান্য সাত দিনের মধ্যে অভিযুক্ত ব্যক্তিকে আদালতে হাজির হইবার জন্য নির্দেশ দিতে পারিবে এবং উক্ত সময়ের মধ্যে অভিযুক্ত ব্যক্তি আদালতে হাজির হইতে ব্যর্থ হইলে আদালত তাহার অনুপস্থিতিতে বিচার কার্য সম্পন্ন করিতে পারিবে।

২৬। ফৌজদারী কার্যবিধির প্রয়োগ, ইত্যাদি।—(১) এই আইনে ভিন্নতর কিছু না থাকিলে কোন অপরাধের অভিযোগ দায়ের বা প্রাথমিক তথ্য সরবরাহ, তদন্ত, বিচার পূর্ববর্তী কার্যক্রম, বিচার ও আপীল নিষ্পত্তির ক্ষেত্রে ফৌজদারী কার্যবিধির বিধানাবলী প্রযোজ্য হইবে।

(২) এই আইনের অধীন অপরাধসমূহ আমলযোগ্য (Cognizable) হইবে।

২৭। পরীক্ষাগার।—(১) এই আইনের উদ্দেশ্য পূরণকল্পে, সরকার, সরকারি গেজেটে প্রজ্ঞাপন দ্বারা, এক বা একাধিক পরীক্ষাগার নির্ধারণ করিতে পারিবে।

(২) ধারা ৯ এবং ১৪ অনুসারে কোন পরিদর্শক সার বা সারের কাঁচামাল বা অন্য কোন দ্রব্যের নমুনা পরীক্ষাগারে প্রেরণ করিলে উক্ত পরীক্ষাগার কর্তৃপক্ষ নমুনা প্রাপ্তির ৭ (সাত) কার্য দিবসের মধ্যে পরীক্ষাকার্য সম্পাদন করিয়া পরীক্ষার ফলাফলের একটি অনুলিপি সংশ্লিষ্ট পরিদর্শক, কৃষি সম্প্রসারণ অধিদপ্তরের সংশ্লিষ্ট জেলার উপ-পরিচালক এবং যে ব্যক্তির নিকট হইতে নমুনা সংগ্রহ করা হইয়াছিল তাহার নিকট প্রেরণ করিবেন।

২৮। সরল বিশ্বাসে কৃত কাজকর্ম রক্ষণ।—এই আইন বা তদধীন প্রণীত বিধি বা আদেশের অধীন দায়িত্ব পালনকালে সরল বিশ্বাসে কৃত কোন কাজকর্মের ফলে কোন ব্যক্তি ক্ষতিগ্রস্ত হইলে বা ক্ষতিগ্রস্ত হইবার সম্ভাবনা থাকিলে তজ্জন্য উক্ত দায়িত্ব পালনকারী ব্যক্তির বিরুদ্ধে দেওয়ানী বা ফৌজদারী মামলা বা অন্য কোন আইনগত কার্যক্রম গ্রহণ করা যাইবে না

২৯। কোম্পানী কর্তৃক অপরাধ সংঘটন।—এই আইনের অধীন কোন অপরাধ সংঘটনকারী ব্যক্তি যদি কোম্পানী হয়, তাহা হইলে উক্ত কোম্পানীর মালিক, পরিচালক, ম্যানেজার, সচিব বা অন্য কোন কর্মকর্তা বা এজেন্ট উক্তরূপ অপরাধ সংঘটন করিয়াছেন বলিয়া গণ্য হইবেন, যদি না তিনি প্রমাণ করিতে পারেন যে, উক্ত অপরাধ তাহার অজ্ঞাতসারে হইয়াছে অথবা উক্ত অপরাধ রোধ করিবার জন্য তিনি যথাসাধ্য চেষ্টা করিয়াছেন। ব্যাখ্যা : এই ধারায়—

(ক) "কোম্পানী" বলিতে কোন সংবিধিবদ্ধ সংস্থা, বাণিজ্যিক প্রতিষ্ঠান, অংশীদারী কারবার, ফার্ম, সমিতি বা সংগঠনকে বুঝাইবে এবং দোকানও উহার অন্তর্ভুক্ত হইবে;

(খ) বাণিজ্যিক প্রতিষ্ঠানের ক্ষেত্রে "পরিচালক" বলিতে কোন অংশীদার বা পরিচালনা বোর্ডের সদস্যকেও বুঝাইবে;

(গ) "মালিক" বলিতে কোম্পানীর ব্যবস্থাপনার সাথে জড়িত নয় এমন শেয়ার হোল্ডারগণ অন্তর্ভুক্ত হইবে না।

৩০। বিধি প্রণয়নের ক্ষমতা।—সরকার, সরকারী গেজেটে প্রজ্ঞাপন দ্বারা, এই আইনের উদ্দেশ্য পূরণকল্পে বিধি প্রণয়ন করিতে পারিবে।

৩১। ম্যানুয়েল প্রণয়ন।- সরকার, এই আইনের উদ্দেশ্য পূরণকল্পে সার পরিদর্শন ম্যানুয়েল এবং ম্যানুয়েল ফর ফার্টলাইজার এনালাইসিস প্রণয়ন করিতে পারিবে।

৩২। অব্যাহতি।- সরকার, সরকারী গেজেটে প্রজ্ঞাপন দ্বারা উক্ত প্রজ্ঞাপনে উল্লিখিত শর্ত সাপেক্ষে, যে কোন সার বা যে কোন শ্রেণীর সারকে এই আইনের সকল বা যে কোন বিধানের প্রয়োগ হইতে অব্যাহতি প্রদান করিতে পারিবে।